

Topaguneak mugimendua nola antolatu eta finantzatu hausnartuko du azaroaren 17ko kongresuan

TOPAGUNEAK 2010. urtean hausnarketa abiatu zuen eta hil honen 17ko kongresuan amaiera emango dio. XXI. *mendeko Euskaldunon Elkartearen Kongresua* izenarekin hasi zuen bidea. Lehenengo fasean, iaz, Euskaldunon Elkartearen Oinarriparrak onartu zituen Topaguneak, alegia, euskara elkartearen mugimenduak datozen hamarkadetan izango dituen gidalerroen proposamena zehaztu zuten.

Azaroaren 17an mugimenduaren antolaketa eta finantzazioari helduko diote. Hiru gai nagusi jorratuko dituzte eta haiei erantzuna eman. Lehenik, antolaketaz arituko dira eta ondoko

gaiak landuko dituzte: mugimenduaren izena eta izana, mugimenduaren barne egituraketa, barne komunikazioa, bazkideekiko harremana, boluntarioen artikulazioa eta funtzioa, lan boluntario eta profesionalaren uztarketa eta transmisioa, besteak beste. Bigarrenik, finantzazioaz arituko dira eta hiru zutabe aztertuko dituzte: komunitatearen sostengua (bazkideetza kuotak eta bestelakoak), zerbitzugintza eta babes instituzionala. Hirugarrenik, Euskaldunon Elkartearen Oinarriparraren adostu dituzten lehentasunak eta funtzioak aurrera eramateko mugimenduaren jardun ildoek hausnartuko dute.

Bahea

Bego Montorio
itzultzaileak *elearazi*
blogean esanak:

“Gure artean, euskararako itzulpena izan baita gaitzesia, ez besterik –euskararako itzulpenik ez, baina gaztelaraz zein frantsesez itzulpenak lasai asko irakurtzen zuen asko egon da gure artean, bigarren multzokoak kasik jatorrizkotzat jota–, eta ez zen kalitate kontu hutsa (Gabriel Arestik *Verlainen Chanson d’automne poema* hain modu ederrean itzuli bazuen, bada posible itzulpena, ez?)”.

EHEko kide Haizea Ramirez de Alda eta Itziar Claver zigortu dituzte

BI EGUNEZ etxean atxilotuta egon beharko dute Ramirezek eta Claverrek, eta isuna ordaindu. Horixe Euskal Herrian Euskaraz taldeko bi kideek jaso duten epaia. EHEren *Ezabatu eta Euskaraz Biz* ekimenean hartu zuten parte bi

kideek eta zigorra ezarri diete 2011ko azaroan Altsasun bide seinaleetan gaztelaniatzeko hitzak ezabatzegatik. Epaileak garbiketaren gatuak ordaintzera zigortu ditu, nahiz eta oraindik ez duten esan isuna zenbatekoa izango den.

Haizea Ramirez de Alda eta Itziar Claverrek adierazi dutenez, ez dago euskaraz bizitzeko aukerarik eta lotsagarria da euskaraz bizitzegatik epaitegian egon beharra. Helegitea jarriko dute eta hilabete batzuk barru izango dute erantzuna.

EKONOMIAREN TALAIAN • TERMOMETROA

Kapitalismoak hil du Amaia

GOBERNU ETA ELIZA GEHIENEK bedeinkatua –ez Katolikoak soilik–, kapitalismoa krudela, terrorista eta hiltzailea da estrukturalki. Pertsonak mespretxatzen dituelako; manipulatu, esplotatu eta zukutzen ditu, ahalik eta etekin gehien ateratzeko, eta behar izanez gero, hil egiten ditu. Ez bakarrik gerrak sustatuz eta babestuz –legalak, ilegalak, zikinak...–. Hiltzen ditu bere lan sistemarekin, lan baldintzak hobetzeko inbertsio faltarekin, eta milaka pertsona kalean uzten dituzten “birmoldaketa” basatiekin. Eta hiltzen ditu lukurreriara hain emana dagoen eta hain krudela den bere finantza sistemarekin: higiezin burbuila sustatu, kredituak erraz eskaini, eta gero, burbuila hori lehertzen denean, bere dirua pertsegitzen du kapitalismoak. Hipoteka-kredituak betearazten ditu eta etxetik kanporatzeak agindu, sistemak berak eragindako langabeziaren eta pobrezia-aren menpe dauden milaka lagun kalean botata utziz.

Jadanik bagenituen terrorismo hiltzaile horren frog

ugari. Milioika pertsona hiltzen dira munduan goseak, hiesak edo beste gaixotasunek jota, kapitalismoari ez zaiolako interesatzen herri horietan jakiak sortzea, bai zik eta euren aberastasun naturalak aprobetxatzea, eta ez zaiolako interesatzen farmakoak eskaintzea. Milaka langile hil dira “lan isticipua” deituriko horietan. Milaka lagun hil dira, eta hilko dira, amiantoagatik. Ehunka langile “suizidatzen” dira despedituak izan baino lehen edo lana galdu ondoren. Joan den astean Barakaldon, Amaia Egañak bere buruaz beste egin zuen, etxetik kanporatzen ari zirenean. Kasu honetan, nola besteetan, kapitalismo horrek izenak eta arduradunak ditu: bankuak –La Caixa Amaiaren kasuan– eta gobernuak dira. Hildakoren bat dagoenean baino ez dira “mugitzen”. Halakoxe terroristak dira kapitalismoa eta bere kudeatzaile politiko eta judizialak. Amaia ere beraiek hil dute.

Juan Mari Arregi

